

A WIG - A WIG
DESA ADAT
PAYANGAN DESA



DESA ADAT PAYANGANDESA
KECAMATAN PAYANGAN
KABUPATEN DAERAH TINGKAT II
GIANYAR
1994

PIDAGING
MAKA BANTANG AWIG-AWIG DESA ADAT
MURDHA CITTA

		Widang
SARGA	I ARAN LAN WEWIDANGAN DESA	1
SARGA	II PATITIS LAN PAMIKUKUH	2
SARGA	III SUKERTA TATA PAKRAMAN	2
	Palet 1 Indik Krama	2
	Palet 2 Indik Dulu/Parajuru Desa	5
	Palet 3 Indik Kulkul	7
	Palet 4 Indik Paruman	8
	Palet 5 Indik Druwen Desa	10
	Palet 6 Indik Sukerta Mapitegep	2
	Kaping 1 Karang, Tegal lan Carik	12
	Kaping 2 Pepayonan	13
	Kaping 3 Wewangunan	14
	Kaping 4 Wewalungan	14
	Kaping 5 Bhaya	15
	Kaping 6 Penyanggran Banjar.	16
SARGA	VI SUKERTA TATA AGAMA	17
	Palet 1 Indik Dewa Yadnya	17
	Palet 2 Indik Resi Yadnya	21
	Palet 3 Indik Pitra Yadnya	22
	Palet 4 Indik Manusa Yadnya	27
	Palet 5 Indik Bhuta Yadnya	28

MURDHA CITTA

AUM, OM

Om Swastiyastu, Om awighnamastu nama sidham,
Putusing sabha krama Desa Adat Payangandesa gumawe
Awig-awig Desa pakraman maka sepat siku-siku pamatut wastu
kasidan prayojanan mami kabeh prasama angidep muah
amagehaken kadi lingging Awig-awig iki.

SARGA I

ARAN LAN WEWIDANGAN DESA

Paos 1

- (1) Desa adat puniki mewasta Desa Adat Payangandesa.
- (2) Jebar kakuwub wewidangannya mewates nyatur :
 - a. Sisih wetan Banjar Badung;
 - b. Sisih kulon Tukad Ayung
 - c. Sisih lor Banjar Melinggih;
 - d. Sisih kidul Carik
- (3) Desa puniki kewangun antuk karang ayahan desa, utawi karang guna kaya tur kasungkemin antuk 1 banjar, muwah banjar kepah dados 4 Tempekan luwire :
 - a. Tempek Kangin
 - b. Tempek Kawuh
 - c. Tempek Tengah
 - d. Tempek Kelod.

SARGA II

PATITIS LAN PAMIKUKUH

Paos 2

Desa adat Payangandesa ngamanggehang pemikukuh minakadi :

- a. Pancasila
- b. Undang-Undang Dasar 1945 pamekas pasal 18;
- c. Perda Tingkat I Bali No. 6 tahun 1986;
- d. Tri Hita Karana manut sada cara agama Hindu.

Paos 3

Luwir patitis Desa Adat Payangandesa :

- a. Mikukuhin miwah ngerajegang sanghyang agama.
- b. Nginggilang tata prawertine maagama.
- c. Ngerajegang kasukerta Desa saha pawonganya sakala niskala.

SARGA III

SUKERTA TATA PAKRAMAN

Palet 1

Indik Krama

Paos 4

- (1) Sane kebawos krama Desa inggih punika, kulewarga sane maagama Hindu saha ngamong Karang Desa utawi Karang Guna kaya.
- (2) Sajaba punika kasinanggeh tamiu.

Paos 5

Krama Desa wenten 5 (limang) paos luwire :

- a. Krama ngarep, kulawarga sane ngamong karang utawi carik.

- b. Krama pengampel/kamplengan, kulawarga sane tanpa karang utawi carik sakewanten sampun mawiwaha.
- c. Krama balu, kulawarga sane ketinggal padem/seda antuk sinalih tunggil suami utawi istrin ipun utawi sangkaning nyapihan.
- d. Krama tapukan, kulawarga sane katinggalin seda olih yayah renan ipun sakewanten durung antos ngayah.
- c. Krama balongan, krama pengampel sane sampun ketinggal seda olih suami utawi istri utawi sangkaning nyapihan.

Paos 6

Kawit dados krama :

- a. Sangkaning ngamong karang utawi carik/pecatu.
- b. Mawiwit pawiwahan.

Paos 7

Panemayan tedun makrama Desa :

- a. Nyabran tumpek kuningan saha majalaran antuk tatengeran sadereng arep ring krama sane ngamongin karang ayahan Desa.
- b. Ngantos tumpek kuningan ngawit sakeng pawiwahan.

Paos 8

Sahanan krama Desa sami keni tategenan/ayah-ayahan miwah pepeson luwire :

- a. Krama marep, mapiteges keni ayahan miwah urunan mamungkul.
- b. Krama pengampel/kamplengan mapiteges keni ayahan mamungkul luput rerampen miwah urunan separo sakeng krama marep.

- c. Krama balu mapiteges keni urunan mamungkul, nanging ayahan ipun manut kawentenang balu inucap.
- d. Krama tapukan, keni ayahan manut sengker nanging urunan keni sakadi patut.
- e. Krama balongan, tan keni ayahan nanging swadarmanipun kaputusan manut pararem.
- f. Prade rikala ngayah wenten sinalih tunggil krama matilar tan pasadok ring prajuru sedereng puput karya wenang krama inucap keni pamidanda tanjek laler kewastaning, mungguing agung alit pamidandan ipun manut pararem.

Paos 9

Krama Desa kadadosang.

- a. Mapuangkit utawi tan tedun sangkaning :
 - 1. Mayadnya, matepetin, kaluasan, sungkan lan sane tiosan manut paparem.
 - 2. Kengin tempo wantah apisan, sajawaning wenten wak-wakan sakeng prajuru.
- b. Nyada, mapiteges mademang ayah risampun mayusa 70 warsa tur tan dados nyuksukin.
- c. Nyade utawi nyuksukin sane kawenangang risampun mayusa 17 warsa utawi sampun mawiwaha tur masidayang nganutin krama.
- d. Ngowot, mapiteges nutug ayah antuk arta brana santukan kapialang utawi ngentosin ayah antuk arta brana manut paetangan prajuru, manawi kajudi antuk sang mawarat miwah sane tiwosan.
- e. Nutug papeson/rerampen antuk jinah ring pura/kahyangan Desa prade krama inucap kacuntaka manut paparem.

Paos 10

Wusan dados krama Desa Luwire :

a. Sangkaning :

1. Pinunas ngraga, manawi kesah ke dura Desa utawi ngalangkungin sagara.
2. Kanorayang, duaning sampun tan prasida ngesehin solah maprawerti, satata nguwug kecaping awig-awig.

b. Sang wusan makrama :

1. Patut ngaturang karang ayahan ke Desa, prade ngamong Karang Desa.
2. Tan polih pahan sangkaning padruweyan Desa utawi Banjar.

Palet 2

Indik Prajuru/Dulun Desa

Paos 11

(1) Desa adat Payangandesa kaenter antuk Bendesa Adat.

(2) Banjar kaenter antuk Klian Banjar.

(3) Tempekan kaenter antuk Klian Tempekan.

(4) Bendesa, Klian Banjar lan Klian Tempekan patut :

a. Mawiwit sakeng krama ngarep utawi pengampel, manut perarem.

b. Kaadegang malarapan antuk kecatri ring parumanya, saha kagentosin nyabran 5 (limang) warsa, sajawaning wenten parindikan tios tur dados kecatri malih.

c. Maduluran Dewa saksi ring Kahyangan Tiga.

Paos 12

- (1) Bendesa adat kasangga olih :
 - a. Patajuh utawi pangliman pinaka wakil.
 - b. Penyarikan pinaka juru surat.
 - c. Patengen pinaka pengamong/Juru raksa druwen desa
 - d. Kasinoman pinaka juru arah.
- (2) Kasinoman akehnya manut kawigunan saha magilir nyabran warsa.
- (3) Sajeroning ngenterang kasukerta niskala Bendesa patut mingsinggihang pemangku kahyangan Desa miwah sang meraga Sulinggih.

Paos 13

- (1) Swadharmaning Bendesa adat luwire :
 - a. Ngenterang pangelaksanaan sadaging Awig-awig miwah pararem Desa.
 - b. Nuntun tur ngenterang krama rawuhing warga desa ngupadi antuk patitis.
 - c. Mawosin kalih niwakang pamutus arep ring wicara warga Desa.
 - d. Maka duta matemuang bawos ring sapasira ugi.
- (2) Prade prajuru/dulu-dulu iwang palaksana keni pemedanda nikel ring kaiwangan soang-soang krama.

Paos 14

- Pituas utawi olih-olihan prajuru/dulun Desa luire :
- a. Luput rerampen/papeson, padagingan keni sakadi patut.
 - b. Polih cenengan.
 - c. Pamupon pecatu/pelaba carik/tegal.
 - d. Pituas tiosan manut perarem.

Paos 15

- (1) Prajuru/Dulun Desa kegentosan riantukan :
 - a. Seda.
 - b. Kanorayang duaning iwang pemargi, utawi nilar sasana
 - c. Wit sakeng pikayunan utawi pinunas ngaraga.
- (2) Nganorayang utawi ngentosin prajuru/dulun - dulun Desa patut ring sajeroning paruman tur kaingkupan antuk krama Desa.

Palet 3

Indik Kulkul

Paos 16

- (1) Kulkul ring Desa Adat Payangandesa luwire :
 - a. Kulkul Khyangan.
 - b. Kulkul Desa Adat/Banjar
 - c. Kulkul Tempekan
 - d. Kulkul Sekaa-Sekaa.
- (2) Tabuh tatepakan kulkul ring Desa adat Payangandesa luwire :
 - a. 2 (duang) tulud lambat tengeran tedun ngayah.
 - b. Atulud bulus, tengeran kageni baya.
 - c. Atulud bulus matalu-talu tengeran jiwa baya/arta baya.
 - d. 10 (dasa) kelentungan, tengeran pawiwahan
 - e. 7 (pitung) kelentungan tengeran anak seda/padem (sane sampun tedun ngayah utawi sampun munggah deha/teruna).
 - f. 5 (limang) kelentungan, tengeran anak alit seda/rare padem.

- g. Suaran kulkul nungting/nungtit, tengeran pujawali ring Kahyangan utawi tengeran surya ghera miwah bulan kapangan.
- h. Tabuh tiga ngempang, tengeran tan durus tedun ngayah.
- i. Ping tiga/tigang kelentungan, tengeran anak alit embas.

Paos 17

- (1) Kulkul Desa, Banjar utawi tempekan tan wenang katepak yening tan sangkaning pituduh prajuru/dulun Desa, sajawaning tengeran kapancabayan.
- (2) Sang nepak tan sangkaning pituduh prajuru/dulun Desa, patut digelis atur supeksa maka buatan panepake, yan tan mangkana wenang kadanda manut pararem.
- (3) Kulkul sekaa-sekaa miwah kulkul pondokan-pondokan tan kalugra nyawerin utawi matehin tatepakan kulkul banjar/Desa sajawaning bhaya, prade mamurug taler kedanda manut pararem.

Paos 18

Indik Paruman

- (1) Paruman/sangkepan ring Desa Adat Payangandesa wenten :
 - a. Paruman Desa Adat, sane kawentenang :
 - 1. Nyabran ngasasih, rikalaning tumpek maduluran arah-arah.
 - 2. Napkala (patgata kala) majalaran arah-arah manut tatujon.
 - b. Sangkepan/paruman prajuru, kawentenang manut wiguna.
 - c. Sangkepan sekaa-sekaa manut mabuat.

- (2) Paruman ring Desa Adat Payangandes madudonan sakadi ring sor :
- a. Prasida lumaksana risampun ketedunin antuk sang patut ngamiletin paruman, kamanggala antuk tengeran kulkul, miwah abusana adat madia saha tan kalugra makta gagawan, tan maren ngarcana Ida Bhagawan penyarikan saha sarana widhiwidana marupa cane.
 - b. Masarana antuk janggi, pangawit kelaksanayang penyacak sep-sepan saha risampun puput paruman, kalaksanayang panyacak dadosan. Agung alit dadosan ipun manut pararem.
 - c. Tan kalugra ngawetuang suara gora utawi biyota nguman-nguman ring sabha utawi ring genah paruman. Prade wenten sinalih tunggil krama asapunika patut keni danda bea pacamil.
 - d. Pamutus bawos beriuk sapanggul (ingkup) punika kemanggehang.
- (3) Prade pidaging paruman tan kaingkupin mangda prajuru/dulun Desa ngilikang babawos, saha putusanya kaingkupin/kararemin antuk krama Desa bilih tan prasida kararemin/kaingkupin jantos ping 3 (tiga), prajuru wenang nunas bawos ring ngawiwenang.

Paos 19

- (1) Sajeroning paruman Desa, Bendesa patut nyiarang pamargine ngenterang Desa pamekas nganinin indik :
- a. Nunjuk lungsuring pekraman saha ayah-ayahan, sulur arta brana druwen desa.
 - b. Rencana prajuru/dulun Desa nganinin indik usaha Desa kapungkur.

- (2) Pamutus paruman Desa sinanggeh pararem maka pamitegep pelaksanaan awig-awig.

Paos 20

- (1) Sangkepan prajuru/dulun Desa kawentenang wantah ngarincikang pangerencana Desa kapungkur.
- (2) Sangkepan prajuru/dulun Desa tan wenang ngamedalang tategenan ring krama sadereng kaingkupin antuk krama.
- (3) Pamutus sangkepan prajuru/dulun desa ngawetuang pasuara manawi wenten pituduh sang ngawiwenang saha ngonekang pecak pararem krama desa.

Palet 5

Indik Druwen Desa

Paos 21

Padruwen Desa Adat Payangandesa sakadi ring sor :

- a. Kahyangan Desa luwire :
 1. Kahyangan Tiga : Pura Desa/Bale Agung
 2. Pura Dalem Pekung
 3. Pura Prajapati.
 4. Pura Taman Sari.
 5. Pura Catur Bhuana
- b. Bale Desa/Bale Banjar/Bale Adat.
- c. Tanah tegalan/telajakan Pura
- d. Karang ayahan Desa.
- e. Setra
- f. Palaba Pura marupa carik, malinggah 36 are.
- g. Lelanguan makadi tetabuhan lan ilen-ilen padruwen Desa adat luwire :

- Gong 1 barung

h. LPD (Lembaga Perkreditan Desa)

Paos 22

Piolihi-olihi Desa adat Payangandesa luwire :

- a. Poihi sakeng pelaba Pura.
- b. Urunan Krama Desa.
- c. Piolihi sakeng LPD
- d. Paica sakeng Guru Wisesa
- e. Punia/aturan tiosan sane patut.

Paos 23

- (1) Pajuru/dulun Desa wenang ngetangan pamupon pelaba Pura muah sane tiosan padruwen Desa.
- (2) Pikolihi lan pamupunya kaanggen prabea piodalan miwah wewangun ring Pura.
- (3) Nyabran pesangkepan Desa, Dulun desa pengemong padruwen Desa patut nyobiahang munjuk lungsuring padruwen Desa arep ring krama Desa sami.
- (4) Sakaluiring druwen Desa patut wenten ilikitanya.
- (5) Tan kalugra ngadol/nyandayang ngesahang padruwen Desa, yan tan kasungkemin antuk krama Desa.

Palet 6
Sukerta Pamitegep
Kaping 1
Karang, Tegal Lan Carik

Paos 24

- (1) Krama Desa pengemong karang Desa utawi karang guna kaya patut ngawatesin karang inucap antuk tembok utawi pagehan/turus mangda pekantenanya asri.
- (2) Wates sisi kaler miwah kangin kakaryaning antuk krama sane ngamong karang ayahan inucap, sane mawasta gagaleng keluan.
Sajawaning tanah pecatu, tegal utawi tanah padruwen ngaraga sane kapiara wantah gagaleng kateben, manut dresta ring subak.
- (3) Prade kerasayang pagehan/turus inucap ngalikadin yen pada arsa panyandinge kangin batese nganggen pinget kewanten kesaksi antuk prajuru utawi maka cihna paal sakeng sang angawarat.
- (4) Prade wenten karang Desa Kabebeng utawi empet mangda kautsahayang wenten pamarginya utawi pangutangan toyannya manut paigum lan pararem.

Paos 25

- (1) Sinalih tunggil krama Desa tan kalugra :
 - a. Ngalah-alah margi karang ayahan Desa.
 - b. Ngalah-alah tanah linggih kahyangan, setra lan sekancan genah sinanggeh suci.
- (2) Prade wenten sakadi ring ajeng, sang ngalah-alah wenang ngawaliang tanah inucap, saha keni pamidanda sapatutnya muah kadulurin upakara ring pengalahan tanah suci.

Paos 16

Sahanan karang sane mapanyanding margi, patut mamiara telajakan utawi ambal-ambal inucap saha nandurin antuk tetanduran sane ngawinang Desane makanten asri.

Kaping 2

Pepayonan

Paos 27

- (1) Ngawit nandur pepayonan tanam tuwuh patut adepa agung utawi 2 (duang) meter ngajeroang sakeng bates, prade jantos ngaliwat bates wenang kasepat gantungin.
- (2) Yening wenten tetanduran ngungkulin, samaliha mawastu mayanin kapisaga patut kawera antuk paigum pinih ajeng, gumentos sang neruwenang wit punika ngarebah utawi notor.
- (3) Prade sampun kawera taler tan wenten usaha sang neruwenang wit sang rumasa katetehan/kajerihan wenang masadok ring prajuru tur risampun ketatas kalugra ngicalang wit inucap, sakewanten patin pepayonan puniki patut katawur manut pangelokika sang nepasin.
- (4) Sang keni pamidanda, taler patut keni penyangaskara saha prabea manut pararem arep wewangunan sang karubuhin luire :
 - a. Sang neruwenang wit sinanggeh mayani, prade pungkut ngarubuhin wewangunan krama tios.
 - b. Krama notor, munggul utawi ngarebah taru tur ngarubuhin krama tios.
- (5) Krama Desa patut ngemanggehang kawerdian tanem tuwuh sane ngawinang Desane makanten asri.

Kaping 3
Wewangunan

Paos 28

- (1) Nyabran ngawangun patut :
 - a. Masadok ring prajuru/dulun desa pinih ajeng yang prade wewangunan punika nganinin bates.
 - b. Ngangge sasukatan sata bhumi, miwah gagulak asta kosala kosali, sanistane manut ring patitis niskala.
 - c. Tan ngayubin kapisage.
- (2) Prade wewangunan jantos ngayubin bilih-bilih temboke ring telengin wates, risampun kawera tur kasadokan ring para dulu wenang kadanda manut pararem, saha tembok inucap kagubar utawai sanistane kakaryanang abangan.

Kaping 4
Wewalungan

Paos 29

- (1) Sahanan krama Desa sane mamiara wewalungan minakadi babi utawai banteng miwah sane tiosan, sahananing wewalungan ipun patut sayaga nitenin negul/ngelogor utawi ngandangin wewalungan inucap mande tan ngarusakin karang utawi pabianan krama tios, bilih-bilih jantos ngeranjing ngaletihin kahyangan/tegak sane kasinanggeh suci makadi pura.
- (2) Prade wenten wewalungan malubar utawi ngeleb tur ngarusakin pekarangan miwah pabianan krama tios, risampun kawera kengin ketaban, tur kedanda ngawaliang wit sane rusak saha nawur panebas papiara tetabanan,

anut panelokika prajuru/dulun Desa.

- (3) Prade jantos ngeletehin tegak suci, minakadi pamerajan (sangguh kamulan) risampun kaparitatas antuk prajuru/dulun desa wenang sang neruwenang kedanda mabuhu agung, tatebasan prayascita durmanggala, utawi panca sata iwak bebek welang kalung prade jantos ngaletehin kahyangan tiga utawi pura-pura pemaksan.
- (4) Krama Desa patut nyanggra wewalungan miwah sarwa prani tan kepatutan mademang paksi miwah nuban ulam miwah sane tiosan.

Kaping 5

B h a y a

Paos 30

- (1) Parindikan bhaya luwire : Jiwa bhaya, arta bhaya (kepandangan) duracara ring agama.
- (2) Sang manggihin kahanan Jiwa bhaya, patut nepak kulkul bulus mapitulung manut Paos : 16 (2) aksara c.
- (3) Prade ring Desa kehanan Jiwa bhaya, patut Desane ngaturang bhuta yadnya tur sang meyanin/beane katur ring sang sane ngelaksanayang jiwa bahaya puniki.
- (4) Prade wenten jadma nguman-nguman utawi memisuh jadma tios pamekas ring paruman/pesangkepan krama, patut keni pemedanda pamerayascita.

Paos 31

- (1) Sang manggihin arta bhaya (kemalingan) patut ngukul mapitulung anut ring Paos 16 (2) aksara c, utawi sang kemalingan atur supeksa ring prajuru/dulun Desa, sane nimbangin utawi nandanin, tur sang melaksana katur ring sang mawarat, saha mawuwuh penyangaskara prade

- weten jadma ngemaling barang-barang kasinanguh suci.
- (2) Pratingkahe mapilon ring dusta kabawos saruron, prade wenten jadma ngemanggihin maling, raris tan nyadokang ring Prajuru/Dulun Desa jantos jadma tios nyaduang, patut kedanda kadi dandaning maling, akeh pengargan wit tur kasukserahang ring sang ngawiwenang.
 - (3) Manda tan katuwekang kadi ajeng, asing-asing ngeranjingin kakubon jadma tios patut :
 - a. Matetegepan suara (makaukan)
 - b. Nyantos sang nuwenang karang rawuh utawi masadok ring pengapit sane pinih tampek maka buatan pangerajinge.
 - c. Pamedal karangnya kadangin sawen marupa carang kayu madaging don makacihna pengarah rikala suwung.
 - (4) Prade wenten jadma ngarereh reramon, minakadi daun kelapa, ron tanpa sadok ring sang nuwenang wit, prade kacunduk/katara patut kedanda kadi dandaning maling.

Kaping 6
Penyanggran Banjar

Paos 32

Krama Desa rikala ngwentenang karya sukha dukha patut kesangga antuk Banjar luire :

- a. Prade ngawangun pitra yadnya utawi manusa yadnya, manut pinunas sang mayadnya.
- b. Pangerombo utawi karya suka duka ring suang-suang pakubon krama kesanggra antuk panguing sasidan.
- c. Pangrombo rikala pitra yadnya manut abot ingat karya utawi yadnya prade sakeng semeng jantos wengi patut katuran panguing ping kalih.

SARGA IV
SUKERTA TATA AGAMA

Palet 1
Indik Dewa Yadnya

Paos 33

- (1) Kahyangan panyiwian Desa adat Payangandesa luwire :
 - a. Kahyangan tiga :
 1. Pura Desa/Bale agung.
 2. Pura Dalem pekung, miwah Pura Prajapati.
 - b. Pura-Pura Tiosan.
 1. Pura Taman Sari
 2. Pura Catur Bhuana
- (2) Rahina piotalam ring soang-soang kahyangan inucap kadi ring sor :
 - a. Ring kahyangan tiga luwire :
 1. Pura Desa/Bale Agung, rikala Bhuda Umanis Julungwangi
 2. Pura Dalem Pekung/Prajapathi, Anggara sasih kesanga.
 - b. Ring Pura tiosan makadi :
 1. Pura Taman Sari rikala Buda Wage Kelawu.
 2. Pura catur bhuana, rikala caniscara keliwon Wayang.
- (3) Pangaci ring Pura inucap manut sastra agama saha kalaksanayang nista, madya, utama manut kawentenang lan pararem.
- (4) Pengempon suang-suang Pura manut ring sor :
 - a. Pura Bale Agung/Pura Desa kempon antuk Krama Desa.
 - b. Pura Dalem kaempon antuk Krama Desa sami.

- c. Pura Taman Sari taler kaempon antuk Krama Desa.
- d. Pura Catur Bhuana kaempon antuk Krama Desa.

Paos 34

- (1) Ring soang-soang Pura inucap kaadegang Pemangku
- (2) Ngadegang pemangku manut dodonan :
 - a. Turunan/Ngewaris
 - b. Nyanjan mapiteges, mapinunas ring natar pelinggih/
Pura, antuk nuur balian konteng / balian siksik lan
sapanunggilanya.
 - c. Kacatri antuk Krama Desa.
- (3) Tan kawenang angge pemangku luwire :
 - a. Cedangga, luwire : peceng, perot, cungh lan
sapanunggalanya.
 - b. Sang sapa sira ugi sane tan kapatutang manut
pararem.
 - c. Sungkan ila, buduh utawi edan.
 - d. Sane madrebe kesucian urip tan becik.
- (4) Prabea kepemangkuan :
 - a. Adhiksa widhi (pawintenan) kamedalang saha kalaksa-
nayang antuk sang ngadegang pemangku, makadi krama
Desa utawi pangempon Pura soang-soang.
 - b. Mapitra Yadnya riwekas prade kulawarga pemangku tan
marasidayang, patut kasungkemin antuk krama Desa
utawi pangemong, sanistane maprayascita, saha
penyanggrane manut pararem. Yadnya kelaksanayang
antuk wargan sira Mangku.
- (5) Pemangku patut ngemanggehang sasaning pemangku, manut
sastra agama.

Paos 35

Swadharmaning pemangku luwire :

- a. Ngenterang upacara piodalan ring kahyangan utawi ring soang-soang pakubon krama.
- b. Prade pemangku kepialang utawa cuntaka, kengin nyelang pemangku tiosan utawi nuur sang Sulinggih.
- c. Samaliha yang sampun pamangku tedun ayah ring pura, kancit wenten kulawarganya, seda mangku inucap tan keneng cuntaka, sakewanten mangku tan budal selami piodalan.

Paos 36

Pituas utawi olih-olihan pamangku luwire :

- a. Pahan sarin canang manut pararem
- b. Sarin canang suang-suang pakubon krama.
- c. Upon pelaba carik/tegal manut pararem.
- d. Luput kakarya lan papeson/rerampen, nanging pedagingan keni sakadi patut, muah piolihi tiosan manut pararem.

Paos 37

(1) Pemangku kegentosin riantukan :

a. Seda.

b. Pinunas ngaraga, manawi kageringan lan sapanunggalanya.

c. Kawusang antuk krama, manawi melaksana sane tan patut (asta corah).

(2) Parade pemangku kauwusang sangkaning nilar sasana keni pamidanda manut pararem saha ngawaliang prabea pawintenane pecak.

Paos 38

Kasukertan kahyangan sakadi ring sor :

a. Tan kalugra ka Pura luwire :

1. Sang katiben cutantaka luire :

- a. Sebel kandel ngaraja sewala sami dereng mabresih
- b. Sebel maduwe putra.
- c. Sebel pengantenan, sadereng mabeakala miwah cuntaka sangkaning kapademan manut senger.
- d. Sebel riantukan maduwe kulawarga kapandeman/kelayu sekaran.

2. Makta sahaning barang sinanggeh ngaletihin.

3. Sato agung sajawaning rikala mapepada.

4. Mabusana tan manut kadi tata caraning ngrajing ka Pura.

5. Sadereng polih wak-wakan sakeng parajuru/dulun desa.

b. Pratingkahe tan wenang ring Pura :

1. Masumpah (cor) sajawaning pituduh parajuru.

2. Makobetan, masesenengan, makolem dados asiki lanang wadon, mabacin/mewirah mawyawiraha, nyangsang busana, menahin pusungan, micecepin rare, riantukan asapunika, rikala ngayah majajaitan, makarya sangan patut ngelung busung macingor lidinya.

3. Mungguh tedun ring pelinggih sajawaning pituduh pajuru.

c. Sang mamurug kecaping ring ajeng keni pamidanda pamrayascita sepatutnya.

Paos 39

- (1) Yan wenten jadma kerawuhan ring pura, kengin kapintonin prade rumasa kasumangsayan, yang tan wiakti jadma inucap patu kasisipan manut pararem.

- (2) Prade kahyangan kehanan durmanggala, minakadi bhaya pamangku utawi sang manggihin bhaya patut nyadokang ring prajuru. mangda prajuru digelis marumang Krama Desa tur ngawentenang pamrayascita sepatutnya.

Palet 2

Indik Resi Yadnya

Paos 40

- (1) Sang pacang madeg pandita utawi pinandita minakadi balian sonteng, dalang, miwah saluiring sane jagi ngenterang yadnya. patut masadok ring prajuru, desa kalih Parisadha Hindu Dharma.
- (2) Prajuru Desa patut nureksanin saha nitenin yen prade wenten cihna sane tan manut ring kecap sastra, miwah dresta tur sareng nyaksinin upacara pengadegan inucap, saha nyiarang/ nyobiahang ring paruman Desa, tegap rawuhing wates kawenangane rikala ngenterang yadnya.
- (3) Krama Desa patut ngaturang ayah rikala wenten upacara ngadegang pandita/pinandita ring ajeng katuntun antuk prajuru/dulun Desa.

Paos 41

- (1) Sang Sulinggih patut ngariinin/dumunan ngarayunin ring sawewidangan Desa adat Payangandesa riwus asapunika wawu kengin muputang yadnya kajebar jagat tios utawi kepura-pura tios saha patut masadok ring prajuru/dulun Desa.
- (2) Krama Desa sami patut ngawas wiadin nitenin, tur katuntun antuk prajuru/dulun Desa, mangda sahanan yadnya sane kawentenang kapuput antuk pandita/pinandi-ta manut kawenanganne soang-soang.

Palet 3
Indik Pitra Yadnya

Paos 42

Pamargin pitra yadnya madudonan manut sakadi ring sor :

- a. Pangupakaran sang kelayu sekaran :
 1. Mendem utawi ngeseng, maka cihna pakingsan ring ibu pertiwi ring Bhatara Brahma, selami nuptupang prabea.
 2. Atiwa-tiwa (upakara pengabenan) utawi pelebon.
- b. Upacara pitra yadnya riwus kaabenang kelanturang munggah don bingin utawi ngroras.

Paos 43

Swadharmaning lan tategenan krama prade wenten sinalih tunggil krama kelayu sekaran :

- a. Sang kaduhkitan patut :
 1. Nyadokan ring Kelian Banjar muah Bendesa tur nunas tatimbangan ring kawentenanya.
 2. Ngaturin krama ngarombo makarya eteh-ete sawa, maduluran sangu utawi panyembrama sasida antuk.
- b. Swadharmaning krama banjar luwire :
 1. Bendesa/Kelian banjar maritatas pamargin sang kaduhkitan napike pacang kapendem, makingsan riin utawi lantur kaabenang.
 2. Prade kapendem, raris kasuarayang kulkul petahu manut paos 16 (2) aksara e olih kelian Banjar utawi wakilnya.
 3. Penyanggran Banjar selanturnyane :
 1. Soang-soang krama patut nedunin patus, agung alit patusnya manut pararem.

2. Ngarombo ngaryanin eteh-ete sawa jantos puput.
 3. Sami krama banjar nganter ke setra jantos puput mapendem.
- c. Tan kangin ngalelet :
1. Prade Kapendem patut pramangkin, sajawanin rahina kekeran.
 2. Prade pacang kepelebuang sakirangnya jantos 22 rahina.
- d. Tan kalugra nginepang bangbang miwah mendem rikala :
- Soma Umanis Taulu, Purwani, Purnama, Tilem, Buda Umanis, Anggara kasih Buda wage/Buda Cemeng, miwah tumpek.
- e. Prade wenten kalayu sekaran rikala piodalan ring Pura, dados mendem pakingsan risampun masadok ring prajuru, mamargi sasiliban, pamarginya wengi tan nyuarayang kulkul.
- f. Dewasa kekeran mendem luwire :
- Kala gotongan, semut sedulur, was panganten, ingkel wong, pasah, purwani, purnama, tilem, piodalan ring kahyangan miwah rerainan jagad.

Paos 44

- (1) Sane kasinanggeh cuntake sakadi ring sor :
- a. Cuntaka antuk kalayu sekaran.
 - b. Cuntaka antuk ngaraja sua.
 - c. Cuntaka antuk ngebaang putra.
 - d. Cuntaka antuk karuron.
 - e. Cuntaka antuk sungkan ila/buduh.
 - f. Cuntaka antuk pawiwahan.
 - g. Cuntaka antuk gamia gumana.
 - h. Cuntaka antuk salah Timpal.

- i. Cuntaka antuk karuron
- y. Cuntaka antuk mamitra ngalang
- k. Cuntaka antuk yening wenten anak istri ngawentenang putra sadurunge maupekara pabeakalan muah pawidi widana.
- l. Cuntaka antuk sad tatayi
- (2) Sengker cuntaka manut kawentenanya :
 - a. Cuntaka kelayu sekaran, cuntakanya :
 - 1. Krama Banjar tigang rahina ngawait sakeng mendem.
 - 2. Kulawarganya 42 rahina
 - b. Cuntaka ngeraja sewala 3 rahina ngawit sakeng ngeraja sewala utawi jantos puput ngraja sewala saha maduluruan antuk mabersih.
 - c. Cuntaka ngembasang putra, tigang sasih ngawit saking putranya embas marep ring anak istri ngembasang putra, miwah 12 rahina mantuk ring sane lanang, jantos sampun kakaryanang upakara nyambutin saha pamarayascita manut daging satra agama lanang wiadin istri.
 - d. Cuntaka karuron, kabinayang sekdi ring sor :
 - 1. Bobotan sedereng matuuh 3 sasih, tan nyarayang kulkul. *(tan ngalokhon jagat)*
 - 2. Bobotan sasampun matuuh 3 sasih jantos sadurunge maketus patut nyuarayang kulkul, sakewanten krama banjar nenten ngambil cuntaka.
 - e. Cuntake pawiwahan, cuntakanya ngantos sasampune kelaksanayang utawi matirta pabeakalan.
 - f. Cuntaka gamia gamana, cuntaknya ngantos sasampune kepalasang utawi masapihan tur sampun kawentenang pamarayascita raga muwah pamarayascita Desa utawi Kahyangan.

- g. Cuntaka salah timpal, cuntakanya patut kasisipang ring krama desa sekadi manut ring sastra agama, muah drestane ring Payangandes, cuntakanya ngantos kelaksanayang pamerayascita raga/Kahyangan.
 - h. Cuntaka anak istri mobot nenten kelaksanayang upakara pabeakalan cuntakanya ngantos kawentenang upakara pabeakalan.
 - i. Cuntaka mamitra ngalang, cuntakanya ngantos kawentenang upakara pabeakalan.
 - y. Cuntaka ngebaang putra, nenten kawentenang upakara pabeakalan miwah pawidhi widanan, cuntakanya ngantos wenten sane meras sang putra punika tur sampun kelaksanayang upakara sakadi pituduh sanghayang agama.
 - k. Cuntaka sad atatayi, cuntakania ngantos sampun maprayascita raga tur nenten pisan kalugra ngungahang upakara padwijatian.
- (3) Cuntaka kelayu sekaran/kependeman :
- a. Kependem cuntakania :
 - 1. Cuntaka/sebel banjar jantos tigang (3) rahina. riwusnia mendem utawi risampun polih prayascita. (mesapuh).
 - 2. Kulawargania sajeroning pekarangan ngantos 42 rahina.
 - b. Kaaben cuntakania :

Sang nyambut karya pitra yadnya, cuntakania ngawait saking ngawangun karya jantos puput yadnyanira (mapegat) kalanturang malih tigang (3) rahina.
- (4) Sane katiben cuntaka luwire :
- a. Kelayu sekarang sane cuntaka :
 - 1. Sang sane kelayu sekaran.

2. Kawulawargania.
3. Bebanjaraan/Krama Desa.
- b. Ngraja sewala sane cuntaka :
 - Sang sane ngraja sewala.
- c. Ngembasang putra sane cuntaka :
 - Kawulawargania sane ngembasang putra lanang lan istri.
 - Cuntaka sane lanang 12 rahina.
- d. Pawiwahan sane cuntaka :
 - Sang sane mawiwaha lanang lan istri.
- e. Karuron sane cuntake :
 - Sang sane karuron.
- f. Gamia gamana sane cuntaka :
 - Sang sane ngelaksanayang gamia gamana.
- g. Anak istri mobot nenten kawentenang upakara pabeakalan sane cuntaka :
 - Sane maraga istri/sane mobot.
- h. Mamitra ngalang sane cuntaka
 - Sane ngalaksanayang mamitra ngalang.
- i. Ngembasang putra sane tan kewentenang upakara pabeakalan miwah pawidhi widana sane cuntaka :
 - Sang sane ngembasang putra
 - Putra sane embas.
- (5) Tan keneng cuntaka luwire :
 1. Sang Sulinggih/Mangku Kahyangan Tiga/pengabih Mangku, sajawaning kulawarganya tunggal natah, utawi pasiwanya seda/padem.
 2. Krama banjar, rikalaning sampun ngalang ngasasin ring pura.

Paos 45

- (1) Atiwa-tiwa/pangabenan kalaksanayang antuk :
 - a. Sawa Resi
 - b. Sawa Prateka
 - c. Suasta
- (2) Panemayan pengabenan wenten kalih Paos :
 - a. Ngaben dadakan / bah bangun dados kalaksanayang yening prade ngaraksa sungkan ila/ngalalah manut pidartan dokter.
 - b. Ngaben ngamasa mamargi sekadi patut manut pararem.
- (3) Dudonan pengabenan ngawit sakeng ngagah/seda/ngawangun, ngeseng sawa ngantos pangiriman/ngajut ngantos ngaroras.

Paos 46

- (1) Papatusan pengabenan wenten kalih Paos :
 - a. Ngaben ngamasa polih patus manut pararem.
 - b. Ngaben dadakan pateh sakadi patus kapendem.
- (2) Pangingune ring krama banjar ngawit sakeng tedun ngayah manut abot ingan karya, utawi manut pinunas sang mayadnya utawi manut pararem.

Palet 4

Indik Manusa Yadnya

Paos 47

- (1) Manusa yadnya inggih punika upacara upakara dharmaning manusa ngawit sakeng patemoning kama bang kalawan kama petak ring sajeroning garba ngantos kalayu sekaran riwekas.

5. Ring sarwa ingon-ingon, rikala saniscara kliwon ware uye.
6. Ring sarwa citra reka, rikala caniscara kliwon wara wayang.
- (2) Upacara pebeakalan/pekala kalaan manusa manut widhi widana, kabawos pabeakalan.
- (3) Upacara pabeakalan ring pertiwi, kahyangan lan babutan kawastanin macaru.
- (4) Pacaruan inucap nista, madia, utama, manut wiguna sakadi ring sor :
 - a. Ekasata
 - b. Pancasata
 - c. Pancasanak
 - d. Resigana
 - e. Tawur agung
 - f. Panca kelud.
- (5) Sajawaning kadi ring ajeng kawentenang upacara upakara
 - a. Majot-jotan utawi yadnya sesa nyabran wusan ngarateng.
 - b. Masapuh sapuh ring Pura rikala pacang wali/piodalan.

Paos 49

- (1) Nangken ngawarsa rikalaning tilem kasanga kawentenang tawur kesanga kalanturang antuk ngarupuk, maka cihna pacang mapag rahina penyepian benjangne.
- (2) Brata penyepian sane kamargiang antuk krama desa :
 - a. Amati geni, tan dados maapi-api
 - b. Amati karya, tan dados nyambut karya.
 - c. Amati lelanguan, tan dados maoneng-onengan masuara gora lan sepanunggalannya.

- d. Amati lalungan, tan dados melancaran.
- (3) Paberatan inucap kemargiang sakeng semeng jantos benjang semeng, raris kasuarayang kulkul macihna paberatan penyepiane sampun puput.
 - (4) Sang amurug kecapin ring ajeng keni pamidanda manut pararem.
 - (5) Riwus rahina nyepi, benjangne maka cihne pengawit icaka warsa patut suang-suang krama desa sami masima krama/madharma santi.
 - (6) Sabinaning punika taler kelaksanayang caru pasasihan.

SARGA V
SUKERTA TATA PAWONGAN

Palet 1
Indik Pawiwahan

Paos 50

- (1) Pawiwahan inggih punika patemoning purusa lawan pradana malarapan antuk panunggalan kayun suka lila kadulurin antuk upasaksi sakala niskala.
- (2) Pamargin pawiwahan luwire :
 - a. Papadikan, kamanggala antuk pakrunan
 - b. Ngarorod, marangkat riyin wawu kakrunayang
 - c. Nyeburin utawi sentana nyeburin
- (3) Pidabdab sang pacang mawiwaha :
 - a. Sampun munggah deha/teruna (prasida nganutin undang-undang sakeng sang ngawarat.
 - b. Sangkaning pada lila (tan paksa)
 - c. Manut kecaping agama (tan gamia gamana)
 - d. Kasudhiwadani prade pengambile tios agama, niwah kepathi wangi, nanging yang tan arsa ngalaksanayang pathi wangi taler kapatutang.

- (4) Pamargin pawiwahan mangde taler nganutin Undang-Undang utawi uger-uger pawiwahan saking sang ngawiwenang.

Paos 51

- (1) Pawiwahan sane kapatutang ring Desa Adat Payangandesa sakadi ring sor :
- a. Sampun kemargiang pabeakalan utawi pasakapan saha pasaksi sekala niskala kapuput olih pandita utawi pinandita.
 - b. Pasaksi sekala antuk prajuru/dulun Desa saha makelingang utawi ngilikitayang pawiwahan inucap.
 - c. Sampun matengeran suaran kulkul, manut paos 16 (2) aksara d.
 - d. Pawiwahan inucap sampun kailikitayang ring sang angawiwenang.
- (2) Parabian sane tan manut kadi ring ajeng, sinanggeh tan patut utawi tan sah.

Paos 52

Tata caraning perabian patut sakadi ring sor.

- a. Sapa sira ugi pacang ngawarangang pakulawargan patut masadok ring Prajuru / dulun-dulun Desa selanturnya Parajuru/dulu maritatas manut tan manut kakecap parabiane.
- b. Pamargin pepadikan anut dudonan :
 1. Parkerunan jantor ping tiga saha soang-soang malarapan :
 - a. Kapertama kabawos pasadok
 - b. Kaping kalih antuk canang pangarawos
 - c. Kaping tiga antuk peras daksina, kabawos pamuput papadikan.

2. Risampun pamragat raris sang istri keajak budal ring pakubon sang sang lanang, saha kalanturang antuk pabeakala.
 3. Mangda pragat tumus sekala niskala, raris kula warga purusa makta pajati ring merajan wadone.
- c. Prade ngarorod/merangkat patut :
1. Reraman lanange ngawentenang pasedek antuk duta kalih diri masarana antuk suar tur tan langkungan ring arahina.
 2. Pagenahan antene tan kengin ring pakubon sang lanang sadereng mabyakala.
- d. Sajeroning pakrunan/pangelukuan patut :
1. Kamanggala antuk geng pangampura arep ring reraman wadone.
 2. Kaigumang bawos indik pakidih utawi palegayan arep ring pasewakan sang ngidih saha dewasa pakrab - kambeyane riwekas.
 3. Kacihnayang indik kapurusa utawi prade sentana rajeg kajejerang, kapatut ngidih anak lanang sane kabawos pawiwahan nyeburin, tur punika kemanggehang sentana nyeburin.
 4. Prade pakrunan tan katerima, pakrunan kemargiang jantos ping tiga pawiwahan ngalantur kemargiang.
- e. Pekerab-kambeyan mapiteges upacara tinas apadang (puput) mapikuren, duaning manut sakadi ring sor :
1. Sajeroning kabawos ambe, kelaksanayang ring niskala antuk sarana jejauman miwah pawidhi widana :
 - a. Jejauman pinaka ngambe/ngadungang kayun soang-soang pakulawargan wadone.
 - b. Widi widana punika pejati niskala nunas wadone ring pamerajaan kamulanya.

2. Sejeroning bawos kerab pelaksana ring sekala.
 - a. Antuk penyaksi para dulu duaning kakerabin antuk tengeran kulkul.
 - b. Pamakas penyaksi prajuru/ dulun-dulun, saha ngilikitayang.

Palet 2
Indik Nyapihan

Paos 53

- (1) Pawiwahan kabawos wusan malarapan antuk palas perabian utawai ketinggal seda.
- (2) Wusan mapikuren riantukan salah sinunggal seda mapiteges balu, makadi balu lanang /istri.
- (3) Palas perabian sangkaning mawiwit wicara.
- (4) Sang ayat palas merabian patut atur supekse pailikitan riyin ring sang rumawos, mawastu kabawos nyapihan, wawu dulu nyiarang kawetenannya ring desa adat, saha keni panebus suaran kulkul manut pararem.

Paos 54

Tata cara palas parabian sekadi ring sor :

- a. Nawur prabea pasaksi.
- b. Polih pahan paguna kaya.
- c. Pabekel, tadtadan soang-soang kakuasa niri-niri miwah warisan kekuasa antuk purusa.
- d. Ngaweruhin miwah ngupajiwan pratisentanana manut swadarmaning guru rupakan
- e. Nawur pamidanda panumbas kulkul manut perarem
- f. Meberas kuning.

Paos 55

- Prade riwekas sang palas kacihnan adung malih, patut :
- a. Ngelaksanayang pawiwahan malih.
 - b. Kadande nikel saking palase.
 - c. Prade balu langkungan ring ping kalih patut marayascita raga.

Paos 56

- (1) Sang balu kabinayang dados :
 - a. Balu luh wit sentana (sentana rajeg) miwah balu luh boya prati sentana.
- (2) Swadharmaning balu luh patut :
 - a. Ngamanggehang patibrata tan kengin ngamargiang paradara.
 - b. Nguasayang waris pagunakayan, tan dados ngadol, ngadeang makidihang lan siosan punika sajawaning kabebasan saking pianak utawi kulawarga pinih tampek saking kurenanya prade pianakne kanton alit-alit.
 - c. Kengin ngidih sentana prade wenten pidabdab sadurung sinalih tunggil padem, saha kabebasan antuk kulawarga singgih kapurusa.
 - d. Kawenangan mawiwaha malih, prade wenten kabebasan anut angka aksara ring ajeng.

Paos 57

- (1) Balu luh kaucap tan pageh luire :
 - a. Paradara
 - b. Matilar saking pakubon tan pasadok jantos 6 (nem) sasih.

- c. Lempas ring swadharmaning balu, tan prasida ngesehin solah maprawerti arep ring pituduh kulawarga purusa, sane patut.
- (2) Prade balu luh pageh katundung, patut polih pah-pahan guna kaya.

Palet 3
Indik Sentana

Paos 58

- (1) Sentana wenten kalih Paos, sane kaucap pratisentana miwah sentana paperasan.
- (2) Pratisentane inggih punika, sentana sane metu saking pawiwahane sane patut.
- (3) Prade pawiwahan tan kepatut, raris ngwetuang sentana mangda tan kanton kawastanin babinjat utawi astra patut kamanggala antuk panyangaskara paperasan.
- (4) Prade pawiwahane tan ngawetuang sentana kengin ngidih sentana antuk upasaksi sekala niskala sane kawastanin sentana paperasan.
- (5) Sentana rajeg inggih punika, pratisentane wadon (pradana) sane kemanggehang lanang (purusa) tur risampun ngalaksanayang pawiwahan keceburin.
- (6) Sang sane dados kaadegang sentana rajeg inggih punika :
- a. Pratisentana wadon tunggal
 - b. Sampun kemanggehang dados pratisentana lanang (purusa)
 - c. Kapawiwahang keceburin, kautamayang ring jadma sane maagama Hindu. Utawi maagama tiosan sane sampun ngalaksanayang upacara sudiwadani.

- d. Sane kemanggehang sentana rajeg patut masadok ring prajuru, tur prajuru patut nyiarang ring Desa Adat.

Paos 59

- (1) Sapasira ugi krama pacang ngidih sentana, patut masadok ring Bendesa adat sakirangnya tigang sasih sadereng kemargiang pamerasan.
- (2) Bendesa patut nyiarang ring sawewidangan Desa adat, sang sapa sira ugi rumasa tan lila, mangda nyadokang ring parajuru masengker 14 rahina sedereng pemerasan kemargiang.
- (3) Prajuru/dulun Desa patut digelis mawosin saha ngicenin pamutus nepek ring catur dresta miwah pararem.
- (4) Prade sulur pamerasan tan manut sakadi kecape ring ajeng, dulun desa wenang ngandeg sang pacang mameras saha ngicenin panuntun, mangda kapuputang riin babawosan, sulur utawi wicaranya.

Paos 60

- (1) Paperasan sane kapatutang ring Desa Adat Payangandesa risampun makacihna :
 - a. Widhi widana pamerasan
 - b. Kesaksinin olih dulun desa sane makelingan utawi ngilikitayang.
 - c. Kasiarang/kasobiahang ring wewidangan Desa Adat.
- (2) Sane kapatut peras anggen sentana sakadi ring sor :
 - a. Jadma maagama Hindu.
 - b. Papernahan nedunang sakeng sang meras.
 - c. Kulawarga sakeng purusa, prade tan wenten kengin saking wadon yening taler tan wenten wawu kengin sakama-kana sakeng kayun).

- d. Kautamayang sakeng waris pancer kapurusan.
- e. Sinalih tunggil mawiwit sakeng kulawarga tunggal sanggah utawi merajan paibon lan dadia utawi ngambilin anak tios sakewanten sane maagama Hindu.
- (3) Kengin ngangkat sentana langkungan ring adiri lanang-lanang wadon-wadon prade lanang wadon tan dados kaparabiang.

Palet 4

Indik Warisan

Paos 61

- (1) Warisan inggih punika, tetamian arta berana, utang-utang saha ayah-ayahan ngupadi sukerta sakala niskala sakeng kaluhuranya arep ring turunanya.
- (2) Kang sinanggeh warisan luwire :
 - a. Duwe tengah makadi karang ayahan Desa, kahyangan miwah pusaka.
 - b. Pegunakayan, tetadtadan/jiwa dana utang piutang.
- (3) Wawu kengin kebawos warisan prade wenten :
 - a. Mapiturun (pawaris)
 - b. Keturunan/ahli waris.
 - c. Arta berana miwah tategenan/ayah-ayahan, makacihna warisan.

Paos 62

- (1) Ahli waris luwire :
 - a. Pratisentana Purusa
 - b. Pratisentana predana/sentana rajeg.
 - c. Sentana paperasan lanang utawi wadon.

(2) Prade tan wenten sakadi ring ajeng, kang sinangenh ahli waris patut :

- a. Turunan purusa pernah ngungahang rerama lanang (pekak)
- b. Turunan purusa pernah kesamping makadi semeton, misan, mindon, kaponakan dimisan miwah dimindon.

Paos 63

Swadharmaning ahli waris :

- a. Nerima saha ngawasayang tatamian, pahan sakeng keluhuranya makadi ngempon sanggah, pura saha pangupakaranya miwah nyeledihinin ayahan-ayahan pewaris.
- b. Naurin utang piutang pewaris sane manut pangelokika.

Paos 64

(1) Pengepahan waris manut ring sor :

- a. Risampun kelaksanayang upacara pitra yadnya lan utang piutang pawaris buntas katawur.
- b. Para ahli waris polih pahan pada sangkaning pagunakayan, sajabaning karang ayahan desa kaamong olih ahli waris sane kasinanggeh krama panyeledihi ayah.
- c. Sinalih tunggil ahli waris tan polih pahan prade :
 1. Alpaka guru rupaka.
 2. Sentana rajeg kesah mewiwaha, utawi pratisentana nyeburin punika soang-soang kabawos ninggal kedaton.
 3. Nilar agama utawi nilar kawitan.
- d. Boya ahli waris kengin muponin hasil manut dudonan :

1. Sentana luh saderenge kesah mewiwaha utawi tan alpaka guru miwah prade madrebe pianak tan kangkenin antuk wong atuhanya kengin wantah ngawaris pikolih (paguna kayan) sentana luh kemaon.
2. Balu luh wiadin muani nyeburin (soang-soang boya sentana).
3. Mulih Deha utawi taruna, riantukan ring apawiwahane pecak sampun kabawos ninggal kadaton.
- e. Pewaris kengin maweweh rikala maurip pinaka jiwa dana, tetadtadan utawi bekel, makacihna paweweh tetep ring pianak ipun sane kesah mawiwaha

Paos 65

- (1) Prade ring sajeroning pakulawargan wenten ahli waris langkungan ring adiri patut :
 - a. Kawentenang paigum indik padum waris inucap.
 - b. Yen tan praside, katunasang tatimbang ring duldulu (Kerta Desa).
 - c. Prade taler wenten tan cumpu ring panepas kerta desa, kengin katunasang ring sang rumawos.
- (2) Prade karang inucap kaputungan, patut prajuru/duldulu desa nibakang ring :
 - a. Sang sinanggah ahli waris manut Paos 62
 - b. Sang kengin anggen sentana anut Paos 60 (2) miwah 3.
 - c. Prade taler wenten tan cumpu ring panepas kerta Desa, kengin katunasang ring sang rumawos.
- (3) Prade jantos karang kepah utawi kasepih, patut soang-soang nedunin makrama desa ngarep.

SARGA VI
WICARA LAN PAMIDANDA

Palet 1
Indik Wicara

Paos 66

- (1) Sane wenang mawosin makadi mutusang wicara ring Desa inggih punika prajuru/dulun Desa sane kasinangeh kerta Desa.
- (2) Prade sang mawicara wenten tan cumpu ring pamutus kertas Desa, kengin nunasang wicara inucap ring sang rumawos.

Paos 67

- (1) Sehanan wicara mawiwit kacorahan sakaluire sinangguh nungkasin daging awig-awig miwah perarem Desa/Banjar, parjuru/dulu desa patut digelis mawosin tan nyantos pasadok.
- (2) Sejaba wicara kadi ring ajeng, patut nyantosang pesadok ring sang nunas bawos.
- (3) Panepase patut pastika nyantenang iwang patut malara-pan tri premana (saksi, bukti, ilikita) miwah tan maren nepak ring catur dresta, (bukti, saksi, ilikita).

Palet 2
Indik Pamidanda

Paos 68

- (1) Desa/banjar wenang niwakang pamidanda ring warga Desa sane sisip.

- (2) Paniwak inucap kelaksanayang olih Bendesa /Klian Banjar.
- (3) Bacakan pamidanda luwire.
 - a. Ayahan panukun kasisipan
 - b. Data arta (dosan saha paikel-nikelnya miwah panikel urunan).
 - c. Kedaut karang ayahanya.
 - d. Kanorayang
 - f. Penyangaskara
- (4) Pamidanda sane katikawang patut masor singgih manut ring kasisipane.
- (5) Jinah utawi raja berana pamidanda ngranjing dados druwen Desa/Banjar.

Paos 69

- (1) Krama sane tan nawur urunan manut sengker, wenang katikelang, risampun katikelang, teler tan nawur wenang kerampas.
- (2) Rerampasan nganggen tata cara ring sor
 - a. Kelaksanayang antuk dulu kasarengin antuk krama tigang diri maka saksi.
 - b. Sang ngerampas saha darsana ngambil barang utawi nyawenin tanem tuwuh akehnya manut ring utang san merampas.
 - c. Prajuru/Dulun Desa mitekedang manda barang-barang sane kerampas digelis katebus, masengker awuku ring kutus rahina pacang kaadol.
 - d. Tan nganinin indik saluiring barang sane patut inggilang manut agama miwah mademang pangupajiwa sang kerampas.

Paos 70

- (1) Prade sang kerampas ngawera/ngalangi, pamargi inucap mawastu sampun tan nganutin awig-awig desa wenang kanorayang.
- (2) Samaliha yang purun taler ngalangi pengelaksanane ring ajeng tan wenten pamargi sajawaning kedaut karang ayahanya.
- (3) Pamidanda inucap manut pararem keni buntas risampun sang kekeninin :
 - a. Nunas geng pengampura ring krama desa riantukan nguwak pasebayan utawi daging perarem pecak.
 - b. Nawur pengargan penguwak pasubayane duk pacang kerampas kadulurin pemerayascita pinaka penyaksi kaiwangan ring desa.

SARGA VII

NGUWAH NGUWUHIN AWIG-AWIG

Paos 71

- (1) Nguwah nguwhin Awig-awig desa adat puniki kelaksana yang antuk paruman Desa.
- (2) Awig-awig puniki kemargiang ngawit kaingkupin (karare-min).

Paos 72

- (1) Sakaluiring sane wenten sederengnya patut keanutang ring Awig-awig puniki.
- (2) Sakaluiring sane durung kebawos sajeroning Awig-awig puniki patut kalaksanayang manut tata cara sane sampun memargi kadulurin antuk pararem-pararem.

SARGA VIII
PAMUPUT

Paos 73

- (1) Awig-awig puniki kararemin duk : ranina çaniscara,
Pancawara : Kelowon, Wara Kuningan Penanggal/pengelong
Ping Kutus, Sasih Kelima, Içaka warsa 1916.
Tanggal Masehi 12 November 1994
- (2) Awig-Awig puniki kalingga tangani olih Bendesa
kasarengin antuk Klian Banjar, Klian Tempekan, saha
kasaksinin olih Prajuru Dinas.
- (3) Luwir sang ngalingga tanganin :

A. Kapertama prajuru /Dulun Desa :




Klian Tempek Kangin

I MADE JUNI

Klian Tempek Tengah

I KETUT BANYAK



Klian Tempek Kawuh

I NYOMAN NGERNGER

Klian Tempek Kelod

I WAYAN WATES

B. Kaping kalih Parajuru Dinas Pinake Saksi



Kepala Desa Melinggih,

IDA BAGUS GEDE ARNAWAYASA



Kepala Dusun Payangandesa,

I WAYAN RAPI



Camat Payangan,

I Wayan Suila, BA.

Penata muda Tk. I
NIP : 600005503